



UNDANG-UNDANG MALAYSIA

Akta A1105

AKTA PERGIGIAN (PINDAAN) 2001

Tarikh Persetujuan Diraja ... 13 Jun 2001

Tarikh diterbitkan dalam *Warta* ... 28 Jun 2001

Hakcipta Pencetak (H)

PERCETAKAN NASIONAL MALAYSIA BERHAD

Semua Hak Terpelihara. Tiada mana-mana bahagian jua daripada penerbitan ini boleh diterbitkan semula atau disimpan di dalam bentuk yang boleh diperolehi semula atau disiarkan dalam sebarang bentuk dengan apa jua cara elektronik, mekanikal, fotokopi, rakaman dan/atau sebaliknya tanpa mendapat izin daripada **Percetakan Nasional Malaysia Berhad (Pencetak kepada Kerajaan Malaysia yang dilantik)**.

UNDANG-UNDANG MALAYSIA

Akta A1105

AKTA PERGIGIAN (PINDAAN) 2001

Suatu Akta untuk meminda Akta Pergigian 1971.

[]

DIPERBUAT oleh Parlimen Malaysia seperti yang berikut:

Tajuk ringkas

1. Akta ini bolehlah dinamakan Akta Pergigian (Pindaan) 2001.

Pindaan Bahagian VII

2. Akta Pergigian 1971 [Akta 51] dipinda dengan menggantikan Bahagian VII dengan Bahagian yang berikut:

“BAHAGIAN VII

PERUNTUKAN-PERUNTUKAN TAMBAHAN BAGI MAKSUD-MAKSUD NEGARA

Maksud, permulaan kuat kuasa dan tempoh Bahagian ini

46. (1) Bahagian ini diperbuat bagi maksud-maksud negara.

(2) Bahagian ini hendaklah terhenti berkuat kuasa jika Parlimen, melalui ketetapan yang diluluskan oleh setiap Majlis Parlimen dan disiarkan dalam *Warta*, memperuntukkan bahawa Bahagian ini tidak akan berkuat kuasa lagi.

Notis kepada orang berdaftar supaya berkhidmat sebagai pegawai pergigian dalam perkhidmatan awam

47. (1) Tiap-tiap orang yang memperoleh pendaftaran di bawah seksyen 12 boleh, sebaik sahaja dia didaftarkan sedemikian atau pada bila-bila masa selepas itu, disampaikan kepadanya suatu notis bertulis yang dikeluarkan oleh atau bagi pihak Ketua Pengarah yang menghendaki orang itu supaya memegang jawatan sebagai pegawai pergigian dalam apa-apa jawatan dalam mana-mana perkhidmatan awam dan pada apa-apa tarikh, dalam setiap hal ini, sebagaimana yang dinyatakan dalam notis itu.

(2) Seseorang yang disampaikan kepadanya suatu notis di bawah subseksyen (1) hendaklah mematuhi notis itu dan jika dia tidak berbuat demikian maka dia melakukan suatu kesalahan di bawah Akta ini.

(3) Sebaik sahaja suatu pertuduhan di bawah subseksyen (2) atau di bawah seksyen 48 dibuktikan dalam mahkamah terhadap mana-mana orang, pendaftaran orang itu di bawah seksyen 12 hendaklah disifatkan sebagai terbatal, dan Pendaftar hendaklah memotong nama orang itu daripada Daftar.

(4) Jika nama seseorang dipotong daripada Daftar di bawah subseksyen (3), maka nama orang itu tidak boleh dimasukkan semula ke dalam Daftar kecuali atas arahan yang diberikan oleh Menteri, dan Menteri boleh memberikan arahan sedemikian apabila permohonan bertulis dibuat kepadanya oleh orang yang namanya telah dipotong daripada Daftar.

(5) Apa-apa arahan yang diberikan oleh Menteri di bawah subseksyen (4) berkenaan dengan mana-mana orang boleh dijadikan tertakluk kepada penunaian apa-apa terma dan syarat yang difikirkan oleh Menteri patut dikenakan, dan terma dan syarat itu boleh termasuk terma dan syarat yang menghendaki orang itu berkhidmat sebagai pegawai pergigian dengan memuaskan hati Ketua Pengarah selama suatu tempoh terus-menerus yang berjumlah tidak kurang daripada tiga tahun dalam apa-apa jawatan atau jawatan-jawatan dalam mana-mana satu

perkhidmatan awam atau lebih sebagaimana yang ditentukan dari semasa ke semasa oleh Ketua Pengarah menurut budi bicaranya.

(6) Semasa orang yang namanya dimasukkan semula di bawah subseksyen (4) menunaikan terma-terma dan syarat-syarat yang dikenakan di bawah subseksyen (5) dia hendaklah disifatkan didaftarkan setakat yang perlu untuk menunaikan terma dan syarat yang dikenakan di bawah subseksyen (5) dan bagi apa-apa maksud lain sebagaimana yang diarahkan oleh Menteri, tetapi tidak lebih daripada itu; dan apabila terma dan syarat yang dikenakan di bawah subseksyen (5) telah ditunaikan maka dia adalah berhak mendapatkan suatu perakuan yang dikeluarkan oleh Ketua Pengarah sebagai keterangan mengenai penunaian itu.

(7) Keputusan Menteri atas sesuatu permohonan yang dibuat kepadanya di bawah subseksyen (4) supaya dimasukkan semula sesuatu nama ke dalam Daftar adalah muktamad dan tidak boleh dipersoalkan atau dikaji semula dalam mana-mana mahkamah.

(8) Jika sesuatu notis di bawah subseksyen (1) telah disampaikan kepada mana-mana orang yang boleh disampaikan kepadanya notis itu maka Ketua Pengarah boleh, pada bila-bila masa membatalkan notis itu dan, jika difikirkannya patut, menyebabkan supaya disampaikan kepada orang itu suatu notis selanjutnya di bawah subseksyen (1).

Tempoh perkhidmatan menurut notis di bawah seksyen 47(1)

48. Seseorang yang mula berkhidmat dalam sesuatu jawatan dalam sesuatu perkhidmatan awam menurut notis yang dikeluarkan di bawah seksyen 47(1), hendaklah terus berkhidmat dalam jawatan itu atau dalam apa-apa jawatan atau jawatan-jawatan kemudiannya yang lain dalam perkhidmatan awam yang sama atau dalam mana-mana perkhidmatan awam yang lain sebagaimana yang ditentukan dari semasa ke semasa oleh Ketua Pengarah menurut budi bicaranya selama suatu tempoh terus-menerus yang berjumlah tidak kurang daripada tiga tahun dengan memuaskan hati Ketua Pengarah dan jika dia tidak berbuat demikian maka dia melakukan suatu kesalahan di bawah Akta ini.

Kuasa Menteri untuk memberikan pengurangan, pengecualian atau penangguhan tempoh perkhidmatan di bawah seksyen 48

49. (1) Menteri boleh, melalui perintah yang disiarkan dalam *Warta*—

- (a) berkenaan dengan mana-mana orang tertentu;
- (b) secara am berkenaan dengan mana-mana golongan orang dalam apa-apa tempoh sebagaimana yang dinyatakan olehnya;
- (c) secara am berkenaan dengan semua orang dalam apa-apa tempoh sebagaimana yang dinyatakan olehnya,

memberikan apa-apa pengurangan yang difikirkannya sesuai atau pengecualian penuh daripada tempoh perkhidmatan yang dikehendaki di bawah seksyen 48.

(2) Menteri boleh, apabila permohonan bertulis dibuat kepadanya oleh mana-mana orang yang kena menjalani tempoh perkhidmatan yang dikehendaki di bawah seksyen 48, memberi orang itu penangguhan daripada memulakan perkhidmatan itu selama apa-apa tempoh yang difikirkannya sesuai jika dia berpuas hati bahawa adalah adil dan munasabah untuk berbuat demikian.

(3) Keputusan Menteri atas sesuatu permohonan yang dibuat kepadanya di bawah subseksyen (2) adalah muktamad dan tidak boleh dipersoalkan atau dikaji semula dalam mana-mana mahkamah.

Menteri boleh membuat kaedah-kaedah

50. Menteri boleh membuat kaedah-kaedah bagi melaksanakan tujuan-tujuan dan maksud-maksud Bahagian ini.”.

